

**Kitab Suci Injil Isa Al Masih
nang diilhamakan lawan
Lukas
Edisi percobaan**

2

*Maulid Isa Al Masih dihabarkan ulih
malaikat
2:8-20*

⁸ Wayah malam di antangan kuta Betlehem, bubuhan panjaga inguan parahatan manjaga binatang inguannya di padang. ⁹ Bakakajutan ada malaikat nang badiri parak bubuhannya. Lalu cahaya Allah manyinari bubuhannya tadi, lalu ai bubuhannya takutan banar. ¹⁰ “Jangan takutan” ujar malaikat. “Aku mambawa habar baik gasan bubuhan ikam. Habar nang ini cagar mahimungakan samunyaan urang. ¹¹ Hari ini di kuta Raja Daud, hanyar diranakakan Al Masih, Junjungan nang datang gasan manyalamatakan bubuhan ikam. ¹² Ini nah cirinya: bubuhan ikam cagaran mandapati saikung anak halus nang disalimputi lawan tapih. Anak halus tu dirabahkan di wadah makanan binatang inguan.” ¹³ Bakujutan kumpulan malaikat lain batampai wan bakumpulan wan malaikat nang panambaian tu. Bubuhannya bamula mamuji Allah. ¹⁴ “Allah hu akbar! Mara ha samunyaan malaikat mamuji Allah. Wan di bumi mara ha

manusia nang dibarkahi Allah manarima damai sajahtera.”

¹⁵ Imbah malaikat malaikat mainggalakan bubuhannya wan babulik ka surga, bubuhan panjaga inguan bapandir antara bubuhannya, “Ayu kita tulakan ka Betlehem. Nyaman kita malihat saurang paristiwa-paristiwa nang dihabarakan Allah tadi.” ¹⁶ Badadas ai bubuhannya tulakan ka situ. Sakalinya badapat jua bubuhannya lawan Siti Maryam, wan Yusup wan anak halus tu nang dirabahkan di wadah makanan binatang inguan. ¹⁷ Imbah malihat anak halus tu, bubuhan panjaga inguan mahabarakan napa nang diucapkan malaikat-malaikat tadi manganai anak halus tu. ¹⁸ Samunyaan urang hiran mandangar habar bubuhan panjaga inguan tu. ¹⁹ Tagal Siti Maryam manyambunyiakan samunyaan parkara nitu dalam hatinya wan mamikirakannya. ²⁰ “Syukur Al Hamdulillah” ujar bubuhan panjaga inguan mamuji Allah sambil bulikan. “Samunyaan nang hanyar kita lihat wan hanyar kita dangar pas banar lawan napa nang dipadahkan malaikat tadi” ujanya pulang.

Isa disunat, dingarani wan didoa'akan di Bait Allah

2:21-24

²¹ Ganap dalapan hari, Anak nang itu disunat lalu dingarani Isa. Ngaran nang itu dipadahkan malaikat sabalum Siti Maryam batianan.

²² Pas wayahnya adat pambarasihan manurut hukum nang disampaikan ulih Nabi Musa,

Yusup lawan Siti Maryam mambawa Anak nitu ka Bait Allah di Yarusalem gasan didoa'akan. ²³ Sualnya di dalam hukum Allah nang disampaikan ulih Nabi Musa tatulis nang kaya ini, "Satiap anak lalakian nang panambaian harus disarahakan ka Allah."* ²⁴ Allah jua mawajibakan amun anak panambaian lalakian, kuitannya musti mamparsambahakan kurban nang kaya ditantuakan hukum Allah, sapasang burung darakuku atawa dua ikung anak burung dara. Maka handak ai kuitan Isa malakuakan nang kaya itu jua.

Allah bajanji mautus Al Masih gasan manyalamatakan manusia

2:25-31

²⁵ Wayah itu di kuta Yarusalem, ada saikung lalakian nang takwa wan saleh. Ngarannya Simiun. Sidin lagi mahadangi datangnya Al Masih nang dijanjikan Allah gasan manyalamatakan bubuhan Israil. Sidin dipimpin ulih Ruh Allah. ²⁶ Sidin dipadahi Ruh Allah bahwa sidin kada cagar mati sabalum malihat Al Masih. ²⁷ Lantaran dipimpin Ruh Allah, sidin baampah ka Bait Allah. Kabalujuran wayah itu, Yusup wan siti Maryam mambawa Isa ka situ jua gasan mangurbanakan burung lawan mandoa'akan Isa nang kaya diwajibkan Kitab Suci Taurat. ²⁸ Pas Simiun malihat Anak halus nang itu, dihimpunya ai sambil mamuji Allah. ²⁹ "Ya Allah" ujar Simiun badoa, "Janji pian gasan ulun sudah dikabulkan.

* **2:23** 2:23 Lihati Keluaran 13:2, 12, 15.

Maraha ulun maninggal dalam kaadaan damai sajahtra.

- ³⁰ Sualnya ulun ni sudah malihat utusan Pian nang cagar manyalamatakan manusia.
- ³¹ Anak nang ini Pian pilih gasan samunyaan urang.
- ³² Inya tu nang kaya cahaya gasan manarangi samunyaan suku bangsa. Lawan pulang inya cagaran mandatangakan kahormatan gasan umat Pian, bangsa Israel.”

4

Nabi Isa ditolak wan handak dimati'i di kampung Sidin saurang

¹⁶ Lalu Nabi Isa sampai ka kuta Nazaret, banua Sidin diganalakan. Wayah hari Sabat (hari istirahat wan sambahyang gasan juriat Nabi Ibrahim), nang kaya biasanya, Sidin masuk ka rumah ibadat. Lalu Sidin badiri gasan mambacaakan Kitab Suci. ¹⁷ Imbah itu, Sidin dijulungi sabuah gulungan Kitab Suci, surah Nabi Yasaya. Dibuka Sidin ai, lalu tadapat bagian nang handak dibacaakan manganai Al Masih. Di situ tatulis: ¹⁸ “Ruh Allah marasuki Aku سوالnya Allah mamilih wan mautus Aku gasan mahabarakan ka urang-urang susah amun Allah cagaran manulungi bubuhannya. Allah mautus Aku gasan mahabari amun urang nang takurung cagaran dibibasakan, urang nang picak cagaran malihat, urang nang tatindas cagaran dibibasakan. ¹⁹ Allah mautus Aku gasan mahabarakan amun Inya cagaran manyalamatakan

manusia” ujar Nabi Isa mambacaakan surah tadi. ²⁰ Gulungan Kitab Suci tadi digulung pulang wan dibulikakan ka patugas di situ. Imbah itu, duduk ai Nabi Isa gasan mangajar urang-urang nang ada di situ. Samunyaan urang di situ maitihi Sidin. ²¹ “Hari ini, napa nang bubuhan ikam hanyar dengar tadi sudah bamula tajadi” ujar Nabi Isa bamula mangajar.

Nabi Isa maampih kasarangan roh jahat di kuta Kapernaum
4:31-37

³¹ Lalu Nabi Isa tulak ka Kapernaum, sabuah kuta di banua Galilea. Nang kaya biasa, pada hari Sabat, Sidin mangajar urang di rumah-rumah ibadat di situ. ³² Kagum banar urang banyak tu mandangarakan ajaran Nabi Isa. Sualnya Sidin tu bapander bapangaruh. ³³ Di rumah ibadat nang itu ada saikung lalakian nang kasarungan roh jahat. Inya manceleng-celeng sambil bakuciak-kuciak. ³⁴ “Ui! Nabi Isa, urang matan kampung Nasaret! Tulung pang kami jangan diganggu! Pian handak mambinasakan kami kah? Aku tahu ai Pian tu. Pian tu utusan nang suci matan Allah.” ³⁵ “Bahinip ja! Bajauh matan urang ini!” ujar Nabi Isa manyuruh bajauh ruh jahat tadi. Lalu, ruh jahat tadi mahampas urang tadi dihadapan urang banyak. Imbah itu, kaluaran ai roh roh jahat tadi tagal urang tadi kada disakitinya. ³⁶ Samunyaan urang hiran wan baucap ka urang lain, “Hibatnya lah pandiran Sidin tu. Bapangaruh wan bakuasa. Wayah Sidin manyuruh ruh ruh jahat

tu bajauh, langsung maasi ai ruh ruh jahat tu lawan pandiran sidin!”³⁷ Maka habar man-ganai kuasa Nabi Isa dihabarakan ka samunyaan palosok di banua nitu.

6

Urang banyak handak mandangar wan diwa-gasakan ulih Nabi Isa

6:20-42

²⁰ Wayah itu, Nabi Isa manjanaki bubuhan pangikut Sidin, lalu baucap,

“Bahimunglah bubuhan ikam nang susah*, karna bubuhan ikam sudah manjadi anggota karajaan Allah.²¹ Bahimunglah bubuhan

ikam nang lapar, karna bubuhan ikam cagar dikanyangkalan.† Bahimunglah bubuhan ikam nang manangis, karna bubuhan ikam cagaran tatawa.²² Amun bubuhan ikam dimuari, di-

tolak, dihina, wan difitnah lantaran bubuhan ikam maumpati Aku, nang datang matan surga,

²³ bahimunglah wan basuka haja wayah itu. Sualnya pahala gasan bubuhan ikam ganal di

surga. Bubuhan nabi bahari gin diulah nang kaya itu jua. Lantaran itu, bubuhannya dapat pahala matan Allah.²⁴ Cilakalah bubuhan ikam

* **6:20** 6:20 Kata 'susah' di sini baarti urangnya kada baduit nang kaya bubuhan pangikut Nabi Isa sudah maninggalakan harta-harta bubuhannya gasan maumpati Nabi Isa (lihati Lukas 5:11; 18:28). † **6:21** 6:21 Kata 'lapar' di sini bisa jua baarti lapar tahadap makanan atawa lapar tahap Allah atawa duduannya. Kaina dalam karajaan Allah cagar ada aruhan ganal. Lihati 13:28-29; 22:16, 30.

nang sugih, sualnya ikam sudah marasaakan nang nyaman nyamannya haja wayah ini. Kaina tinggal nang cilakanya haja. ²⁵ Cilakalah bubuhan ikam nang wayah ini kakanyangan, kaina ikam cagar kalaparan. Cilakalah bubuhan ikam nang wayah ini tatawa. Kaina ikam cagar basadih wan manangis. ²⁶ Cilakalah bubuhan ikam amun diambung urang tarus. Urang urang bahari nang bapiragah jadi nabi gin diambung jua. Imbah itu bubuhannya dihukum Allah. ²⁷ Tapi kupadahilah, sayangi samunyaan urang tamasuk musuh musuh bubuhan ikam. Babuat baik lah lawan nang muar wan bubuhan ikam. ²⁸ Barkahilah urang nang manyumpahi bubuhan ikam. Doakan nang baik baik gasan samunyaan urang tamasuk nang manjahati bubuhan ikam. ²⁹ Amun urang malapau pipi ikam gasan manyupani ikam, bariakan jua pipi nang subalahnya pulang. Amun jubah bubuhan ikam diambil, biarakan ja inya maambil baju ikam jua. ³⁰ Bari'i urang nang maminta lawan bubuhan ikam! Jangan minta bulikakan ampun bubuhan ikam nang sudah diambil urang. ³¹ Bubuhan ikam handak urang lain malakuakan napa ka bubuhan ikam? Nah, lakuakan ja nang kaya itu jua ka urang lain. ³² Satiap urang musti ada nang sayang wan inya dan nang kada sayang wan inya. Amun bubuhan ikam bapilih hanya sayang wan urang nang sayang wan bubuhan ikam haja, kada bapahala! Urang urang badusa gin sayang jua wan urang nang sayang wan bubuhannya. ³³ Amun bubuhan ikam babuat baik cuma wan urang nang babuat baik wan

ikam, kada bapahala jua. Urang badusa gin babuat baik jua wan urang nang babuat baik wan bubuhannya. ³⁴ Amun bubuhan ikam mainjami cuma ka urang nang kawa mambulikakannya haja, kada bapahala jua. Urang badusa gin mainjami ka urang nang kaya itu jua. ³⁵ Tapi jangan nang kaya itu lah! Sayangi musuh musuh bubuhan ikam. Babuat baik lah wan bubuhannya. Injami ja bubuhannya. Kada usah baharap dibulikakan. Ganal pahala bubuhan ikam kaina. Amun bubuhan ikam balaku nang kaya itu tadi, itu pang mambuktiakan amun bubuhan ikam sudah balaku nang kaya Nang Di Atas. Sualnya Nang Di Atas baik jua wan samunyaan urang tamasuk nang jahat wan nang kada manyukuri pambarian-Nya. ³⁶ Abah bubuhan ikam nang di atas katuju manulung urang. Maka bubuhan ikam harus katuju manulung urang jua nang kaya Abah nang di atas. ³⁷ Jangan maniwas urang, nyaman bubuhan ikam kada ditiwas jua! Jangan mahakimi urang, nyaman bubuhan ikam kada dihakimi jua! Ampuni ja! Kaina ikam gin diampuni jua. ³⁸ Bari'i! Ikam gin dibari'i jua. Bari'i nang baik. Ikam gin cagaran dibari'i nang baik jua. Sabujurnya bubuhan ikam cagar baulihi pambarian nang banyak banar nang sudah ditakar bajubung gasan ikam. Sualnya takaran nang bubuhan ikam pakai gasan urang cagar dipakaiakan gasan ikam. ³⁹ Urang picak kada kawa manuntun urang picak! Kaina kaduduanya bisa tabarusuk ka dalam luang" ujar Nabi Isa bakisah pulang. ⁴⁰ "Kadada pang murid nang tapintar pada gurunya. Tagal

amun inya sudah tuntung balajar, kawa ai sama pintarnya wan gurunya. ⁴¹ Kanapa maka ikam malihat sahimpil kayu di mata dangsanak ikam, tapi balokan di mata ikam saurang, kada ikam lihat? ⁴² Mana kawa ikam baucap lawan dangsanak ikam, 'Ayu dangsanakku maraha aku kaluarakan sahimpil kayu nitu di mata ikam', sadangkan di mata ikam saurang ada balokan nang kada ikam lihat? Ui urang urang nang bapiragah alim. Kaluarkanlah dahulu balokan nang ada di mata ikam saurang. Hanyar ikam kawa jalas malihat wan kawa mangaluarakan sahimpil kayu nitu di mata dangsanak ikam."‡

Ajaran Nabi Isa: Ulahan urang manggambarakan pikiran dalam hati urang

6:43-45

⁴³ Nabi Isa bakisah pulang, "Kadada puhun nang baik nang mahasilakan buah nang kada baik. Kaya itu jua, kadada puhun nang kada baik nang mahasilakan buah nang baik. ⁴⁴ Sualnya satiap puhun dipinandui matan buahnya. Puhun rukam kada babuah limau. Lawan pulang kumpai baduri kada babuah tomat. ⁴⁵ Urang nang baik mangaluarakan hal-hal nang baik-baik matan hatinya nang baik. Urang nang jahat mangaluarakan hal-hal nang jahat matan hatinya nang jahat. Sualnya napa nang diucapkan muntung urang kaluar matan hatinya."

‡ **6:42** 6:42 Nilai carita tadi: urang kada bulih mangaritik urang lain sualnya wayah-wayah kasalahan inya bisa taganal pada kasalahan urang lain. Lawan pulang inya gin rancak kada sadar wan kasalahannya saurang.

Nabi Isa mangajar kanapa maka harus maasi ajaran Sidin

6:46-49

⁴⁶ Wayah itu, Nabi Isa baucap lawan bubuhan pangikut Sidin, “Kanapa maka bubuhan ikam mangiau Aku ‘Junjungan’ tagal kada maasi lawan Aku? ⁴⁷ Urang nang mandatangi Aku, mandangar pandiranKu wan maasi, inya kaya urang nang ⁴⁸ baulah rumah. Inya manabuk dalam-dalam, lalu maandak pundasi rumah di atas batu. Bilanya banyu ba'ah ganal datang mahantam, rumah nang itu kada runtuh sualnya pundasinya nahap. ⁴⁹ Nang mandangar pandiranKu tagal kada maasi, inya kaya urang nang baulah rumah di atas pundasi nang kada nahap. Bilanya banyu ba'ah ganal datang, runtuh ai rumah tu lalu banyak banar karusakannya.”

8

Kisah ampat macam tanah

8:4-8

⁴ Wayah itu, urang bajurut-jurut matan banyak kuta mencari'i Nabi Isa. Imbah saling banyakan urangnya, lalu Sidin bamula bakisah. ⁵ “Nah, ada satu kisah” ujar Nabi Isa. “Saikung patani mahambur banih di ladangnya. Sapalih gugur di jalanan, lalu tajajak urang, wan dipatuk burung sampai lingis. ⁶ Sapalih gugur di babatuan. Banih nang itu tumbuh. Lalu layu lantaran tanahnya kadada banyunya. ⁷ Sapalih gugur di kumpai baduri. Tapi kumpainya nang manang. ⁸ Sisanya gugur di tanah subur. Tumbuh ai lalu

babuahan, saratus kali lipat pada nang dihamburakan” ujar Nabi Isa. “Ingatakan ja pandiranku tadi” ujar Nabi Isa manambahi.

Nabi Isa manjalasakan kisah sidin tadi.

8:11-15

¹¹ “Ini nah arti kisah tadi” ujar Nabi Isa manjalasakan. “Banih nang itu tadi, Pirman Allah. ¹² Banih nang tagugur di jalanan tadi, urang nang mandangarakan Pirman Allah. Tapi lantaran Iblis datang wan marampas Pirman tadi matan hati urang tu, urang tadi kada parcaya wan kada disalamatakan matan hukuman dusanya. ¹³ Banih nang tagugur di babatuan tu, urang nang mandangar Pirman tadi wan himung manarimanya. Tapi nang kaya banih nang akarnya kada kawa tumbuh lagi, inya parcaya satumat haja. Lantaran hidupnya magin ngalih, inya kada parcaya lagi. ¹⁴ Banih nang tagugur di kumpai baduri tu, urang nang mandangar haja. Lalu nang kaya banih kalah wan kumpai tadi, inya kalah lantaran inya mamantingakan hal hal duniawi haja lalu inya kada taat lagi wan Pirman Allah. ¹⁵ Banih nang tagugur di tanah subur tu, urang nang mandangar Pirman tadi lalu maingatakannya tarus sampai bujur bujur taat. Lalu nang kaya banih nang babuahan, inya cangkal babuat baik.”

9

Bubuhan pangikut Nabi Isa hanyar paham amun Sidin tu Al Masih nang dijanjikan Allah

gasan manyalamatakan manusia.

9:18-20

¹⁸ Wayah Nabi Isa lagi badoa saurangan, bubuhan pangikut Sidin baparak. “Ujar urang, Aku ni siapa?” ujar Nabi Isa batakun lawan bubuhannya. ¹⁹ “Ada nang manyambat Pian Nabi Yahya, nang lain manyambat Pian Nabi Ilyas. Ada jua nang manyambat Pian salah saurang nabi, nang hidup pulang” ujar bubuhannya manyahut. ²⁰ “Tapi amun bubuhan ikam pang, Aku ni siapa?” ujar Nabi Isa batakun pulang.

“Pian ni Al Masih nang dijanjikan Allah!” ujar Petrus manyahut.*

Nabi Isa mangisahakan pandaritaannya wan kamatiannya

9:23-26

²³ Wayah itu, Nabi Isa baucap wan bubuhan pangikut Sidin wan urang banyak nang bakumpul di situ, “Amun urang handak manjadi pangikutKu, saban hari inya harus mambuang kahandaknya saurang. Lawan pulang, saban hari inya harus sanggup disambati, sanggup

* **9:20** 9:20 Dalam kitab Taurat, Al Masih adalah urang nang hidupnya samata-mata manjalankan palayanan suci gasan Allah. Sidin dibari kuasa ulih Allah gasan manjalankan palayanan itu. Wayah itu, Petrus wan urang-urang lain nang juriat Nabi Ibrahim maharapkan banar Al Masih datang sabagai raja nang manarusakan raja Daud nang pacangan mambibasakan rakyatnya matan panjajahan musuh nang manyambah barhala. Dalam Al Quran ada tatulis istilah Al Masih nang disambatakan gasan nabi Isa haja (Al-Imran 3:45, An-Nisa 4:157,171,172, Al-Maidah 5:17, 72, Al-Tawbah, Al-Baraah 9:30, 31).

mandarita wan sanggup mati kalu inya handak umpat Aku. ²⁴ Sualnya nang kada sanggup mati lantaran umpat Aku, inya cagaran kada selamat. Tapi nang sanggup mati lantaran umpat Aku, inya selamat di ahirat kaina. ²⁵ Amun ikam panyugihnya di dunia ini, tapi masuk naraka lantaran manolak Aku, napa untungnya gasan ikam? Kadada untungnya! ²⁶ Amun urang supan maakui Aku wan ajaranKu, Aku gin, nang datang matan surga, supan jua maakui inya wayah Aku datang pulang ka dunia ini lawan malaikat malaikat Allah. Wayah itu samunyaan urang cagar malihat kuasa wan tarangKu, kuasa wan tarang Abah di surga, wan kuasa wan tarang malaikat malaikat-Nya.” ²⁷ Sabujurannya antara bubuhan ikam, ada nang kada pacangan mati sabalum malihat karajaan Allah.

10

Kisah urang nang baik hati

10:25-37

²⁵ Wayah itu, ada saikung guru agama ju-riat Nabi Ibrahim nang badiri handak man-jabat Nabi Isa lawan tatakunan. “Guru, kayapa caranya sakira aku baulihi hidup nang salawasan di surga?” ujar guru agama tadi batakun. ²⁶ “Apa jar Kitab Suci Taurat? Napa nang tatulis di situ?” ujar Nabi Isa balas batakun. ²⁷ “Kita musti sayangi Allah lawan saganap hati, saganap jiwa, saganap kaku-atan wan saganap akal budi. Lawan pulang, kita musti sayangi papadaan nang kaya kita

sayangi diri kita saurang” ujar guru agama tadi manyahut. ²⁸ “Bujur pian ni. Turuti ja, kaina pian cagar baulihi hidup nang salawasan di surga” ujar Nabi Isa.

²⁹ “Lalu siapa papadaanku nang harus kusayangi?” balas guru agama tadi kada hakun kalah pandir. ³⁰ “Nah, ada satu kisah,” ujar Nabi Isa manyahut. “Ada saikung lalakian turun matan kota Yarusalem ka kota Yeriko. Inya dipukuli, ditalanjangi, wan dirampok. Wayah inya sudah parak mati, inya ditinggalakan. ³¹ Kabulujuran, datang saikung imam lalu di situ. Imbah maitihi urang tadi, inya maliung wan bajalan tarus. ³² Kaya itu jua saikung urang nang bagawi di bait Allah. Inya maitihi urang tadi jua, tagal inya gin maliung jua wan bajalan tarus. ³³ Imbah itu, datang saikung urang Samaria nang lalu disitu jua. Rahatan maitihi urang tadi, inya maras banar. ³⁴ Diparakinya urang tadi, dibarasihinya lukanya pakai ubat tradisional.* Lalu, dibabatnya lukanya. Imbah itu, urang tu dinaikakannya ka atas kaladai tunggangannya saurang lalu dibawa ka panginapan sakira kawa dirawatnya.† ³⁵ Isuknya, pas handak tulak, inya manjulung duit ka ampun panginapan. ‘Rawatakan inya, kaina kuganti'i samunyaan unkusnya’ ujar urang Samaria tadi. ³⁶ Nah, kaya itu pang kisahnya. Jadi nang mana di antara talu ikung tadi nang balaku sabagai papadaan ka urang nang dirampok tadi?”

* **10:34** 10:34 Ubat tradisional disini adalah 'banyu anggur wan minyak zaitun'. † **10:34** 10:34 Kaladai di sini adalah kaladai urang Samaria.

ujar Nabi Isa batakun wan bubuhan nang mandangarakan Sidin. ³⁷ “Urang nang sudah manulung tu,” ujar guru agama tadi manyahut.

“Nah, tulak ja wan lakuakan nang kaya itu jua” ujar Nabi Isa.

11

Nabi Isa malajari cara badoa

11:1-13

¹ Wayah itu, Nabi Isa lagi badoa di satu wadah. Imbah tuntung badoa, saikung pangikut Sidin mamaraki Sidin. “Oo, Junjungan, lajari pang kami cara badoa nang kaya Nabi Yahya malajari bubuhan pangikut sidin” ujar pangikut Nabi Isa tadi. ² Lalu Nabi Isa baucap, “Wayah bubuhan ikam badoa, sambat ja: Ya Allah, Abah kami nang di atas, kami maakui amun Pian tu Nang Maha Suci. Bakuasa lah atas kami wan samunyaan urang. ³ Bari'i lah kami saban hari makanan nang sacukupnya. ⁴ Ampunilah dusa dusa kami nang kaya kami jua maampuni urang. Jangan lah biarakan kami kalah wayah digudai Iblis.” ⁵ Lalu Nabi Isa bakisah manganai cara badoa. “Jaka ikam landung malam baucap ka kawal ikam di subalah rumah, ‘Wal, inta baras pang, ⁶ lantaran kawalku nang datang matan jauh. Inya handak bamalam di wadahku. Tapi kami kada baisian napa-napa gasan tamu kami.’ ⁷ Kaina kawal ikam tu cagaran manyahuti, ‘Mauk banar ikam ni! Malam sudah landung banar! Lawangnya sudah bakancingan, kakanakan gin sudah guringan.

Wayah ini aku ni kada kawa mambari'i napa-napa gasan ikam!' ⁸ Tapi kupadahilah bubuhan ikam, biar si ampun rumah pamulaannya kada hakun mambari'i napa napa gasan ikam, kaputingannya, inya cagaran mambariakan jua samunyaan nang ikam inta. Sualnya ikam tadi cangkal mainta tarus, kada sing ampihan. Nang kaya itu jua saharusnya amun bubuhan ikam badoa ka Allah. ⁹ Jadi lantaran kisah tadi, inta ja ka Allah, ikam cagaran dibari'i. Cari ja, ikam cagaran baulihi. Kiau ja tarus, maka lawang cagaran dibukaakan. ¹⁰ Sualnya samunyaan nang mainta ka Allah, cagaran baulihi. Wan samunyaan nang mencari'i, cagaran mandapat. Gasan samunyaan nang mangiau tarus, lawang cagaran dibukaakan. ¹¹ Kadada pang abah nang mambari'i ular gasan anaknya amun anaknya mainta iwak! ¹² Kadada jua abah nang mambari'i kalajengking gasan anaknya amun anaknya mainta intalu! ¹³ Bubuhan ikam nang badusa gin tahu mambari'i nang baik gasan kakanakan ikam. Maginnya ai Abah Nang Di Atas. Musti Inya labih tahu. Ruh-Nya gin cagar dibariakan-Nya gasan urang nang maintanya."*

12

Jangan haur mamantingakan hal hal duniawi

12:29-34

²⁹ "Jadi jangan haur mamantingakan napa nang handak dimakan atawa napa nang handak dikinum haja. Kada usah gair manganai hal hal

* **11:13** 11:13 Abah Nang Di Atas di sini baarti 'Allah'.

nitu tadi. ³⁰ Bubuhan ikam jangan kaya urang kafir nang salalu gair manganai samunyaan nang itu tadi. Sualnya urang kafir kada baiman ka Allah wan kada yakin amun Allah maharagunya. Makanya baiman ja ka Abah Nang Di Atas. Inya gin sudah tahu napa nang ikam parlu. ³¹ Daripada haur mencari'i hal hal duniawi tadi haja, cari'i karajaan Allah. Allah gin cagar mambari'i samunyaan nang ikam parlu. ³² Ui bubuhan ikam nang cuma sadikit jumlahnya, kada usah gair kakurangan hal hal duniawi tadi. Sualnya bubuhan ikam sudah manjadi anggota karajaan Allah. ³³ Jual harta ikam, lalu sadakahakan ka urang urang susah. Amun bubuhan ikam mamantingakan kahandak Allah nang kaya itu tadi, bubuhan ikam manabung harta kakal di surga nang kada bisa rusak. Harta itu kada cagar langlam. Sualnya maling kada kawa manyuntannya wan rayap kada kawa marusaknya. ³⁴ Napa nang paling baharga gasan ikam, pasti rancak ikam ganang wan pikirakan, baik harta ikam di dunia atawa harta ikam nang kakal tadi di surga."

18

Urang sumbung wan urang randah hati

18:9-14

⁹ Wayah itu, Nabi Isa bakisah pulang ka urang urang nang maanggap dirinya paling saleh wan katuju marandahakan urang lain. ¹⁰ "Ada satu kisah," ujar Nabi Isa, "Dua ikung lalakian tulak baimbai ka Bait Allah handak badoa. Saikung

pamimpin agama, nang saikungnya tukang tagih pajak nang rancak mambunguli urang.* ¹¹ Nang pamimpin agama badiri manyaurangan. ‘Ya Allah, aku basukur, aku kada kaya urang lain, nang jahat, manipu atawa bajinah wan aku kada kaya tukang tagih pajak tu’ ujarnya mamuji dirinya saurang. ¹² ‘Aku bappuasa saminggu dua kali. Aku basadakah sapuluh parsen matan samunyaan pakulihanku.’† ¹³ Tapi tukang tagih pajak tu badiri jauh, kada wani manangadah ka Nang Di Atas. ‘Ya Allah, marasilah ulun, nang badusa ini’ ujarnya sambil mamusut dada.” ¹⁴ “Tahulah ikam?” ujar Nabi Isa batakun. “Tukang tagih pajak tu nang diampuni wan dihargai Allah, lain pamimpin agama tadi! Sualnya urang nang sumbung cagar dibari supan. Tapi urang nang marandahakan diri, inya cagar dihargai Allah.”

Allah katuju maharagu wan bakuasa atas urang nang randah hati wan baiman ka Inya.

18:15-17

¹⁵ Wayah itu, ada babarapa urang nang mam-bawa kakanakan ka Nabi Isa supaya kawa di-japai wan dibarkahi ulih Sidin. “Ui, jangan mahauri Guru!” ujar bubuhan pangikut Sidin manyariki. ¹⁶ Biar nang kaya itu, Nabi Isa manyuruh kakanakan tadi baparak. “Biarakan ja kakanakan tu datangan ka Aku” ujar Sidin wan bubuhan pangikut Sidin. “Jangan ditangati. Sualnya Allah katuju maharagu wan bakuasa

* **18:10** 18:10 Pamimpin agama ini matan golongan agama nang disambat ‘Urang Parisi’. † **18:12** 18:12 Teks asli: ‘saparsapuluh’.

atas urang nang randah hati wan baiman ka Inya nang kaya kakanakan ini parcaya ka kuitannya. ¹⁷ Sabujurannya, aku bapadah ka bubuhan ikam: Nang hakun mandangar wan maasi Pirman Allah lawan hati nang tulus nang kaya kakanakan ini, inya cagaran masuk karajaan Allah.”

Upah maumpati Nabi Isa

18:28-30

²⁸ “Anu Guru ai” ujar Petrus wan Nabi Isa, “Kami ni sudah maninggalakan samunyaan lantaran maumpati Pian!” ²⁹ “Parcaya ja!” ujar Nabi Isa, “Urang nang maanggap karajaan Allah labih panting pada harta wan kaluarganya, ³⁰ inya cagaran dibalas balipat-lipat ulih Allah di dunia ini wan kaina inya cagaran baulihi hidup nang salawasan di surga.”

Nabi Isa mamadahakan amun Sidin tu cagar dimati'i urang tapi imbah itu cagaran hidup pulang

18:31-34

³¹ Lalu Nabi Isa mangiauw kaduabalas pangikut Sidin. “Dangarakan lah!” ujar Nabi Isa “Wayah jaman bahari bubuhan nabi manulis manganai paristiwa paristiwa nang cagaran tajadi lawan Aku, nang datang matan surga. Samunyaan nang ini cagaran tajadi di Yarusalem. Satumat lagi, kita gin handak tulakan ka Yarusalem. Imbah itu, paristiwa paristiwa nang ditulis bubuhan nabi bahari tadi cagaran tajadi wan Aku. ³² Paristiwa paristiwa nang ditulis bubuhan nabi bahari tadi babunyi kaya ini: Aku cagaran ditangkap wan disarahakan ka urang Roma

gasan diadili. Aku cagaran dihuhuluti, dibari supan, lawan diludahi. Aku cagaran dicambuki wan dimati'i urang. ³³ Tapi talu hari imbah Aku dimati'i, Aku cagaran hidup pulang." ³⁴ Tapi bubuhan pangikut Sidin tanganga. Bubuhannya kada paham napa napa manganai kamatian Sidin lantaran arti pandiran Sidin tadi tasambunyi. Bubuhannya masih kada parcaya amun Nabi Isa tu kawa disiksa, dimati'i wan imbah itu hidup pulang.

21

Bamulanya panderitaan

21:8-11

⁸ Wayah itu, Nabi Isa malajari bubuhan pangikut Sidin. "Baingat-ingatlah," ujar Nabi Isa. "Jangan sampai bubuhan ikam dibunguli manganai napa nang cagar tajadi. Sualnya banyak urang cagar datangan, mamakai ngaran-Ku, wan baucap, 'Akulah Isa Al Masih! Hari kiamat sudah parak.' Tapi jangan maumpati pangaramput pangaramput nang itu. ⁹ Lawan pulang, kada usah gair wayah bubuhan ikam mandangar habar tantang paparangan wan karusuhan. Sualnya hal hal nang kaya itu musti tajadi, tapi wayah itu hari kiamat baluman parak. ¹⁰ Bangsa bangsa cagaran bakalahan. ¹¹ Gampa bumi, bahaya kalaparan, wan wabah panyakit cagar ada di mana-mana. Hal-hal nang manakutanakan cagar bacungulan di langit."

Kadatanganku nang kadua kalinya

21:25-28, 33

²⁵ “Kaina di matahari, bulan wan bintang-bintang cagaran kalihatan ciri-cirinya. Dibumi, bangsa-bangsa cagar takutanan wan kabingungan mahadapi hamukan laut. ²⁶ Manusia cagar kabuliangan wan siupan mahadapi napa napa nang cagar tajadi di saluruh dunia ini, sabab banda banda di langit cagar manjadi kuncang kirap. ²⁷ Rahatan nitu am, Aku, nang datang matan surga, cagaran datang didalam rakun nang liwar tarangnya. Lalu Aku cagaran bakuasa atas samunyaan urang. ²⁸ Wayah masalah nitu mulai tajadi, bahimunglah wan parcaya ja. Sualnya satumat lagi bubuhan ikam cagaran disalamatakan.”

22

Isa Al Masih ditangkap urang

22:47-53

⁴⁷ Wayah itu sudah landung malam. Sagalumukan urang datangan ka Nabi Isa wayah Sidin masih bapandiran lawan bubuhan pangikut Sidin. Bubuhannya tadi dipimpin ulih Yudas nang dahulunya saikung pangikut Sidin. Nabi Isa diparakinya lalu diciumnya. ⁴⁸ “Yudas, Aku sadih banar purunnya ikam mahianati Aku, nang datang matan surga, apalagi lawan ciuman parsahabatan” ujar Nabi Isa. ⁴⁹ Pas malihat kajadian nang itu, bubuhan pangikut Sidin hanyar paham amun Nabi Isa satumat lagi cagar ditangkap urang. “Guru, biar kami lawan haja!” ujar bubuhan pangikut Sidin. ⁵⁰ Lalu saikung pangikut Sidin manyarang saikung hamba katua

imam imam juriat Nabi Ibrahim. Talinga kanan ditataknya. ⁵¹ “Ampih!” ujar Nabi Isa man-agur pangikut Sidin tadi. Lalu dijapai Sidin talinga urang tadi. Langsung waras. ⁵² Nang dibawa Yudas ka sana adalah imam imam, pan-jaga panjaga kaamanan Bait Allah, wan tatuha tatuha matan bubuhan juriat Nabi Ibrahim. Bubuhannya datangan gasan manangkap Nabi Isa. “Aku ni lain panjahat” ujar Nabi Isa wan bubuhannya, “kada usah mambawa parang wan pamangkung! ⁵³ Saban hari, Aku ada lawan bubuhan ikam di Bait Allah. Tapi bubuhan ikam kada manangkap Aku. Tapi hanyar am ini, wayah landung malam, bubuhan ikam man-angkap Aku sakahandak hati ikam haja, pas wayah Iblis bakuasa” ujar Nabi Isa pulang.

23

Nabi Isa dihirit pulang ka Hupnor Pilatus

23:13-25

¹³ Imbah itu, Hupnor Pilatus mangumpulkan imam imam kapala, pamimpin pamimpin bangsa, wan rakyat lalu bacaramah. ¹⁴ “Bubuhan ikam mambawa urang ini ka aku wan baucap bahwa urang nang ini manyasatakan urang. Wayah ini, hanyar inya kuperiksa dihadapan bubuhan ikam. Tapi kadada alasan Aku gasan mahukum Inya. ¹⁵ Kaya itu jua pandapat Hirudis sualnya inya gin mangirimnya bulik ka mari. Ingatakan ja, urang nang ini kada pantas amun dihukum mati. ¹⁶ Jadi, inya kucambuk haja. Lalu, kulapas” ujar

Pilatus manjalasakan. ¹⁷ Satiap tahun, wayah hari raya Paskah, Hupnor Pilatus biasanya malapasakan saikung tahanan gasan bubuhan juriat Nabi Ibrahim. ¹⁸ Urang banyak sudah bakumpulan di situ.

“Mati'i ja inya. Lapasakan si Barabas gasan kami!” ujar bubuhannya bakakaran. ¹⁹ Barabas sudah dipanjaraakan lantaran inya sudah mambunuh urang wan inya sudah maulah tumbur di kuta.

²⁰ “Urang nang ini kada basalah,” ujar Pilatus baucap sakira sidin kawa malapas Nabi Isa.

²¹ “Mati'i ja inya di kayu bapalang! Mati'i ja inya di kayu bapalang!” ujar bubuhannya bakuciakan.

²² “Napa garang kasalahan inya?” ujar Pilatus batakun, “Urang nang ini kada pantas amun dihukum mati. Jadi, inya kucambuk haja. Lalu, kulapas.”

²³ Tagal bubuhannya bakuciakan pulang sing nyaringan mamaksa Pilatus sakira mahukum mati Nabi Isa. Kaputingannya kahandak bubuhannya nang manang. ²⁴ Jadi Pilatus mamutusakan gasan manulusakan kahandak bubuhannya tadi, gasan mahukum mati Nabi Isa wan ²⁵ malapasakan si Barabas nang dipanjaraakan lantaran mambaruntak wan mambunuh urang. Imbah itu, Nabi Isa disarahakan ka anak buah Pilatus gasan dimati'i.

Nabi Isa dimati'i di kayu bapalang.

23:26-43

²⁶ Wayah Nabi Isa dihirit gasan dimati'i, prajurit prajurit malihat Simun, urang Kirene, nang hanyar handak masuk kuta. Simun ditahan lalu disuruh manyahan kayu bapalang tu di bahunya sambil bajalan mairingi Nabi Isa. ²⁷ Banyak banar urang nang umpat mairingi Nabi Isa tamasuk babarapa ikung babinian. Babinian-babinian nang itu manangisi wan maratapi Sidin. ²⁸ Nabi Isa manulih ka bubuhannya wan baucap, "Babinian Yarusalem. Aku kada usah ditangisi. Tagal tangisi ja diri ikam wan kakanakan ikam, ²⁹ lantaran kaina urang cagar baucap, 'Bauntunglah babinian-babinian nang kada suah batianan, wan nang kada suah baranak wan nang kada suah manyusui anak!' ³⁰ Wayah itu, urang cagaran baucap lawan gunung-gunung 'Runtuhlah, tindihi ja kami' wan lawan bukit-bukit, 'Timbuni ja kami!'"* ³¹ Sualnya amun urang nang saleh gin marasai hukuman Allah, maginnya ai urang nang badusa."†

³² Ada dua ikung urang lain nang dihirit baimbai lawan Nabi Isa gasan dimati'i jua. Kaduduanya panjahat. ³³ Pas sampai di bukit nang bangaran Tangkurak, tangan wan batis Nabi Isa dipakui di kayu bapalang. Dua ikung panjahat tadi dipakui jua. Saikung di subalah kanan Nabi Isa. Saikungnya lagi disubalah

* **23:30** 23:30 Wayah itu urang cagar bapandir kaya itu lantaran kamatian cagar dianggap lebih baik pada pandaritaan nang itu.

† **23:31** 23:31 Teks asli: Sabab amun tahadap kayu nang masih hidup, urang sudah baulah kayaini, napa lagi nang pacang diulah bubuhannya tahadap kayu nang sudah karing!

kiwa. ³⁴ “Abah, ampuni bubuhan nang ma-mati'i Ulun ni. Sualnya bubuhannya kada tahu napa nang dilakuakannya” ujar Nabi Isa badoa. ³⁵ Urang nang banyak tu badiri wan manyaksiakan samunyaan kajadiannya. Sedangkan pamimpin-pamimpin agama mahuhuluti Sidin sambil baucap:

“Urang lain Inya salamatakan. Amun inya bujur bujur Al Masih matan Allah artinya nang dipilih Allah, biar haja inya manyalamatakan dirinya saurang.” ³⁶ Prajurit-prajurit gin mahuhuluti Sidin. Banyu anggur asam ditawari ka Nabi Isa. ³⁷ “Amun ikam Raja bubuhan Yahudi salamatakan diri ikam!” ujar bubuhan prajurit tadi.

³⁸ Di bagian atas tihang kayu bapalang nang itu diandak tulisan nang ini: “Inilah Raja bubuhan juriat Nabi Ibrahim.”

³⁹ “Amun ikam tu Al Masih, salamatakan pang diri ikam saurang wan kami” ujar panjahat nang di subalah Nabi Isa mahuluti.

⁴⁰ Tapi panjahat nang saikungnya managur. “Ikam tu dihukum mati” ujanya. “Ikam kada takutankah lawan Allah? ⁴¹ Amun kita ni, pantas haja dihukum mati lantaran kita ni bujur bujur basalah. Tapi Sidin ini kada basalah. Sidin saharusnya kada dihukum mati nang kaya kita ni” ujanya pulang manjalasakan. ⁴² “Nabi Isa, ganang ulun lah, wayah Pian datang bakuasa kaina” ujanya wan Nabi Isa. ⁴³ “Sabujurnya hari ini jua, ikam cagar ada di Firdaus lawan Aku” ujar Nabi Isa manyahut.

Wapatnya Nabi Isa

23:44-49

⁴⁴ Wayah itu, kira kira pukul dua belas siang, harinya talihat bakakajutan kadap di saluruh banua tu sampai pukul tiga kamarian. ⁴⁵ Sualnya matahari kada bacahaya. Lalu kain pahalat Bait Allah tabalah dua.‡

⁴⁶ “Abah, lawan Pian Ulun sarahkan panyawaan Ulun” ujar Nabi Isa sambil badoa lawan suara nyaring.

Imbah itu, Sidin langsung wapat. ⁴⁷ Wayah malihat kajadian nang itu tadi, kapala prajurit nang ada di situ mamuji Allah.

“Dasar bujur urang nang ini urang nang saleh” ujanya. ⁴⁸ Imbah malihat wapatnya Nabi Isa, urang banyak nang bakumpulan di situ bulikan wan basadiah banar. ⁴⁹ Tapi samunyaan kakawalan Nabi Isa, termasuk babinian-babinian nang maumpati Sidin matan banua Galilea, badiri jauh manyaksiakan samunyaan paristiwa paristiwa nang itu.

Nabi Isa dikuburkan

23:50-56

⁵⁰ Wayah itu ada saikung urang matan kuta Arimitia di banua Yudea. Ngarannya Yusup. Sidin tu urang nang saleh wan takwa. ⁵¹ Sidin lagi mahadangi kedatangan karajaan Allah. Biar sidin angguta Makamah Agama, sidin kada akur

‡ **23:45** 23:45 Kain pahalat bait Allah manggambarakan tapisahnya urang biasa matan hadirat Tuhan. Wayah kainnya tabalah, artinya urang biasa kada tapisah lagi matan hadirat Tuhan.

lawan kaputusan Makamah tu gasan mahukum mati Nabi Isa. ⁵² Jadi sidin mainta ijin lawan Pilatus gasan mangubur mayat Nabi Isa. Imbah itu, diijinakannya ai. ⁵³ Lalu, Yusup lawan anak buahnya manurunakan mayat Nabi Isa matan kayu bapalang. Imbah itu, mayat Nabi Isa dikafaninya nang kaya adat juriat Nabi Ibrahim, lalu dirabahakan ka dalam guha batu ulahan nang ditabuk gasan kuburan. Urang lain kada suah dikuburakan di sana. ⁵⁴ Hari itu tamasuk hari persiapan sualnya hari Sabat (hari istirahat wan sambahyang gasan juriat Nabi Ibrahim) sudah parak. ⁵⁵ Babinian-babinian nang datang baimbai lawan Nabi Isa matan banua Galilea, umpat jua lawan Yusup, lalu malihat kuburan Nabi Isa. Bubuhanya malihat jua kaya apa mayat Nabi Isa diandak didalam kubur. ⁵⁶ Imbah itu bubuhanya bulikan lalu manyiapakan rarampahan wan banyu wangi gasan maminyaki mayat Nabi Isa.

Pas tuntung basiap-siap gasan hari Sabat, bubuhannya istirahat lantaran manaati hukum agama.

24

Nabi Isa hidup pulang

24:1-12

¹ Talu hari imbah Nabi Isa wapat, yaitu hari Ahad, baisukan banar, bubuhan babinian

tulakan mambawa rarampahan handak manjarahi kuburan Nabi Isa. ² Tapi, bubuhannya mandapati batu panutup kuburan* sudah taguling. ³ Pas bubuhannya masuk ka dalam guha kuburan tadi, sakalinya mayat Nabi Isa kadada lagi. ⁴ Rahatan bubuhannya taungut kahilangan mayat Nabi Isa, bakakajutan badiri dua ikung lalakian di parak bubuhannya. Baju kaduduanya mancarunung banar. ⁵ Lantaran katakutan, bubuhan babinian tadi basujut.

“Kanapa maka bubuhan ikam mencari urang hidup di wadah urang mati?” ujar dua ikung lalakian tadi batakun. ⁶ “Sidin kadada lagi disini. Sidin sudah hidup pulang. Ingatakan ja pandiran Nabi Isa wayah Sidin masih takumpul wan bubuhan ikam di banua Galilea: ⁷ ‘Nang datang matan surga, cagaran disarahakan ka urang Roma, lalu dimati'i di kayu bapalang. Tagal talu hari imbah dimati'i, Sidin cagaran hidup pulang’ ” ujar lalakian nang bajunya mancarunung banar. ⁸ Lalu taingat ai bubuhan babinian wan pandiran Nabi Isa nang samalam tu. ⁹ Lalu babulik bubuhannya ka Yarusalem gasan mangisahakan samunyaan kajadian tadi lawan sabalas pangikut Nabi Isa wan pangikut pangikut Nabi Isa nang lain nang sudah takumpul di situ. ¹⁰ Babinian tadi nang mangisahakan habar tadi adalah Maryam Magdalena, Yuhana, Maryam nang umanya Yakub wan babinian lain nang taumpat jua. ¹¹ Tapi bubuhan pangikut sidin

* **24:2** 24:2 Batu panutup dipakai ulih juriat Nabi Ibrahim sakira mayat kada dicuntan urang atawa diganggu binatang.

nang mandangar kisah tadi kada parcaya. Dianggap omong kosong haja. ¹² Biar nang kaya itu, Petrus badadas bangun lalu tulak bukah ka kuburan. Wayah inya babungkuk, inya bajinguk ka dalam. Tapi kain kafan haja nang talihat di situ. Hiran banar Petrus lalu bulik batakun dalam hati napa nang tajadi.

Nabi Isa manampaiakan diri Sidin lawan bubuhan pangikut Sidin

24:36-53

³⁶ Wayah itu bubuhan pangikut Sidin lagi bapapandiran, sakalinya bakakajutan Nabi Isa badiri di tengah tengah bubuhannya.

“Assalamu alaikum” ujar Sidin sambil manyapa bubuhannya.

³⁷ Bubuhannya kabuliangan sualnya dikira bubuhannya hantu nang bapandir tadi.

³⁸ “Kanapa maka bubuhan ikam gair? Kanapa jua maka bubuhan ikam masih ragu-ragu amun aku sudah hidup pulang?” ujar Nabi Isa batakun. ³⁹ “Ini nah Aku! Itihi ja bakas luka paku di tanganKu wan di batisKu. Japai ja nyaman bubuhan ikam parcaya. Amun hantu, kada badaging wan kada batulang nang kaya Aku ni!” ujar Sidin majalaskan pulang.

⁴⁰ Wayah bapandir, Sidin manampaiakan tangan wan batis supaya kawa bubuhannya lihat.

⁴¹ Wayah itu bubuhannya baluman parcaya lantaran kahimungan wan kahiranan.

“Adalah baisian makanan di sini?” ujar Nabi Isa batakun ka bubuhannya. ⁴² Lalu dijulung

sahiris iwak basanga. ⁴³ Nabi Isa maambilnya lalu dimakannya di hadapan bubuhannya.

⁴⁴ “Sabaluman Aku dimati'i, sudah kupadahkan lawan bubuhan ikam hal hal nang tatulis tantang Aku dalam Kitab Suci Taurat, Kitab Suci Zabur, wan kitab nabi-nabi. Nah, samunyaan hal nang itu musti tajadi” ujar Nabi Isa manjalasakan. ⁴⁵ Lalu isi kitab kitab tadi dijalasakan Sidin wan bubuhan pangikut Sidin sakira bubuhannya bujur bujur paham artinya.

⁴⁶ Nabi Isa mangiau bubuhannya sakira mandangar, “Nang kaya tatulis dalam Kitab Suci, Al Masih tu musti mati. Tagal talu hari imbah dimati'i, Al Masih tu cagaran hidup pulang. ⁴⁷ Habar nang ini musti dihabarkan ka samunyaan suku suku: Amun urang batobat, baiman lawan Aku, inya cagaran diampuni dusanya wan cagaran dilapasakan matan hukuman dusanya lantaran napa nang sudah Kujalani.

⁴⁸ Bubuhan ikam sudah manyaksiakan amun Aku disiksa wan dimati'i tagal sudah hidup pulang. Makanya bubuhan ikam kusuruh mahabarkan nang ini. ⁴⁹ Kaina cagar Kuutus Ruh Allah nang dijanjiakan Allah gasan bubuhan ikam. Maka hadangi ja di kuta Yarusalem sampai bubuhan ikam manarima kuasa Ruh Allah tu” ujar Nabi Isa manambahi. ⁵⁰ Lalu Nabi Isa mambawa bubuhan pangikut Sidin matan kuta Yarusalem ka banua parak kuta Betani. Pas sampai di situ, Sidin maangkat kadua tangan gasan mambarkahi bubuhannya. ⁵¹ Rahatan Sidin mambarkahi bubuhannya, Sidin diangkat ka surga lalu tapisah wan

bubuhannya. ⁵² Bubuhannya basujut manyambah Sidin lantaran kahimungan, lalu bulikan ka Yarusalem. ⁵³ Lalu saban hari bubuhannya mamuji Allah di Bait Allah.

Bahasa Banjar
Jon, Rut in the Banjar language of Malaysia

copyright © 2019 Wycliffe Bible Translators, Inc.

Language: Banjar

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

3d2b7fde-ff59-503b-a2d0-55ad065cf7df